



Naqqiut

Siunnersuutip kalaallisuuani qulequtaq 24.juli 2018-meersoq taarserneqarpoq

Nuuk, 16. oktober 2018

UKA 2018/173

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Misiliilluni aningaasaliineq nunaqarfinni qerititsivinnik sanaartornissamik annertusaanissamullu tapiisarnerni periutsit pissutsillu pitsaanerpaat anguniarlugit qanoq aaqqiivigineqarsinnaanera pillugit Inatsisartut Naalackersuisut nassuiaasioqqullugit peqquneqarnissaanik aalajangiiffigisassatut siunnersuut. Nassuiaasiornermi isumalluutit suliffissaqartitsinerit kiisalu aningaasaqarnermut tunngasut kommunit, inuussutissarsiornermik ingerlatsisut aammalu KANUNUPE-p misilittagaat ilaatigut ilanngunneqassapput. Nassuiaat Inatsisartunut agguanneqassaaq, tamatumani nassuiaatip inerniliineri AIS20-imut ilanngullugit suliarineqarsinnaalerlugit.

(Inatsisartuni ilaasortaq Peter Olsen, Inuit Ataqatigiit)

Tunngavilersuut:

Aalajangiiffigisassatut siunnersuut qinigaaffik kingulleq UKA2017/40-imik nalunaaqutserneqarsimasoq Inatsisartuni akuersissutigineqarpoq, tamatuma malitsigisaanik §37 naapertorlugu apeqquteqaateqarninnit Naalackersuisunit akissutisivunga maanna Naalackersuisuusut nalunaarusiornissaq sulissutiginiangikkaat, tamannalu tunngavigalugu aalajangiiffigisassatut siunnersuut aammaarlunga siunnersuutigeqqippara.

Nunatsinni sumi tamaani, aalisarneq ingerlallualeraluttuinnartutut sulilu inerikkiartuaartutut oqaatigineqarsinnaavoq.

Nunatsinni aalisarneq inuussutissarsiuutitsinni pingaarnersaavoq qularnanngilarlu aamma suli siunissaq ungasinnerusoq eqqarsaatigalugu taamaattuartaussaasoq.

Taamaattumik aalisakkanik tunisassiorneq sukut tamatigut nutarterlugulu ineriartortittuartaqariarparput; pissutsinut malinnaajuarnissaq pingaaruteqarpoq, aalisakkallu takkusimaarnerisa nalaanni sutigut tamatigut atorluarneqartarnissaat anguniarneqartuartaqarpoq. Taamaasiortariaqarpugut aningaasarsiorluarumalluta nunatsinnilu aningaasarsiornerup assakaasuata ingerlalluarnerulernissaa angusinnaajumallugu.

Massakkut aatsaat taamak aalisakkat takkusimaalerneranni atorluaanissarput pingaaruteqartigilerpoq.

Aalisalerlualerfiup nalaani, aasiit nunaqarfitta ilaani nipi imaattoq tusarsaajualersimavoq; Tunitsivissaalatsivugut – tunitsivissaaleqivugut tunitsivissatsinnik.

Ajoraluartumilli nipi taamaattoq nutaarsiassaangilaq, nutaarsiassaajunnaavissimavormi nunaqarfittatsinnit nipop taamaattup tutsiuttalersimanera.

Nunaqarfippassuarni naammattumik qerititsiveqannginnerup kinguneraa aalisartut aalisakkanik tunisisinnaajunnaartarnerat, taamatuttaarlu aalisartut nuannarinngilluinnagaannik ullormiit ullormut tunisassiornerup unitsinneqartarnera.

Aalisartut ilaquuttaminnut allatulli pilersuisussaasut akiligassanillu takkussuuttuarnik akilersugassaqartuarnut tunitsivissaaleqinerup kinguneranik aningaasarsiornikkut eqqornerlunneqartarput, tamanna ajorluinnarpoq aaqqinneqartariaqarporlu.

Nunaqarfinni qerititsivinnik annertusaanikkut ajornartorsiut tamanna qaangerneqarsinnaalluarpoq, taamaaliornikkullu nunatta aningaasarsiornikkut assakaasuata sukkanerusumik kaavilernissaa ingerlalluarnerulernissaalu qulakkeerneqarsinnaagaluarluni.

Umiarsuarmik tunitsiviusinnaasumik tunitsiviliineq misilittagaasoq ajunngikkaluarpoq, kisianni taamatut aaqqiineq pitsaanerpaangilaq, ataavartumik aaqqiinertut oqaatigineqarsinnaanngimmat, taamaallaalli utaqqiisaangallartumik aaqqiinertut oqaatigineqarsinnaalluni.

Nunaqarfittatsinnili qerititsiveqarnerup tungaatigut annertusaaneq tassaavoq ataavartumik aaqqiineq, aaqqinnerlu taamaattoq, siunissaq ungasinnerusoq eqqarsaatigalugu pitsaanerpaavoq.

Aalisakkat takkuteqqillutillu tammaqqittarput, taamaattumik tammassagaluarpataluunniit takkuteqqinnissaannut piareersimajuaannartariaqarpugut. Taamaattumik nunaqarfittatsinni qerititsiviliinerit toqqorsiveqarnikkullu annertusaassanerit pitsanngorsaanerillu ilerasuutissaanngillat.

Qerititsiveqarnikkut toqqorsiveqarnikkullu annertusaanermi allaqqunneqarsinnaangitsut ilagaat nukissiuuteqarnerup tungaatigut annertusaanissaq. Pissutigalugu, nunaqarfiit ilaanni nukissiorfiit ima annikitsigipput container-imik nutaamik ikkussisoqassagaluarpat, allaat Nukissiorfiup qerititsivittaassaq nukimmik naammattumik pilersorsinnaanagu.

Taamaattumik naggataatigut naatsumik ima oqaatigalugu; Nunaqarfittatsinni qerititsiveqarnikkut annertusaaqqissagutta, pisariaqartitsineq qanoq annertugisoq iluamik ilisimannngilarput, taamaattumik pisariaqartitsineq eqqortoq qanoq annertutiginersoq paasisaqarfigisinnaajumallutigu, pisariaqartitsinerullu aningaasatigut qanoq kinguneqarumaarnissaa eqqornerusumik paasisaqarfigiumallutigu Naalakkersuisut nalunaarusioqqullugit inatsisartut aalajangiiffigisassaannik siunnersuuteqarpunga. Nalunaarusiallu upernaaru 2019-mi saqqummiunneqarnissaa kissaatiginarpoq, taamaaliornikkut kingusinnerpaamik 2020-miit nunaqarfittatsinni qerititsiveqarnikut annertusaasinnaanerit aallartinneqarsinnaaqqullugit.

Taamatut tunngavilersuuteqarlunga matumuuna siunnersuutiga inatsisartunut suliassanngorlugu tunniuppara, neriullunga siunnersuutiga tapersorsorluarneqarumaartoq

Paasisutissatut inatsisartut suleriaasiat §37 malillugu apeqqutikka 175/2017 aamma 128/2018 normulerneqarsimasut ilanngussami takuneqarsinnaapput.¹

¹ https://ina.gl/documents/para3637/2017/svar/2017_175_Nukissiorfiit_peol_akissut.pdf aamma

Pisortanut aningaasatigut allaffissornikkullu kingunerisassai:

Siunnersuutigineqartup suliarinissaanut AC najoqqutaralugu ukiup affaanik qaangiinissaq naatsorsuutigineqanngilaq

Nunaqarfiit nukimmik naammattumik pilersitsisinnaanngitsut nukimmik naammattumik pilersitsisinnaalersinneqassappata aningaasatigut qanoq kinguneqarnissaat pillugu § 37 aqqutigalugu apeqquteqaatinni Naalakkersuisut imatut akissuteqarput:

“Containerinik qerititsivinnik atassusiinerni, pitsaanerpaamik pisoqarpat, taamaallaat innaallagissamut ikkuffissaq ikkunneqartussaavoq. Nukissiorfiit 30.000-50.000 koruunit akornanni akeqassasoq naliliipput. Generatorit pisinnaasaannik annertusititsinissaq pisariaqalissappat, generatorimik allamik pissarsilluni, ataatsimut katillugu 450.000-500.000 koruunit missaannik akeqassaaq.

Aningaasartuutit matuma siuliani allassimasut, attaviliinernut akiliuteqarnerni aalisakkerivimmuut nammakkersuissapput. Tamatuma saniatigut ukiuunerani pisariaqartitsinernut naammattumik ikummatissaqarnissaq qulakkeerniarlugu, ikummatissanut tankimik sulii allamik tankiliinissaq pisariaqartinneqarsinnaavoq. 500.000 koruunit missaanni akeqassasoq naliliisoqarpoq. Generatorimik allamik pisinnaasaqarnerit ilaneqarnissaat pisariaqartinneqarpat, kisianni maannakkut innaallagissiorfimmi inissaqarani, nutaamik innaallagissiorfiliornissaq imaluunniit pioreersup allilerneqarnissaa pisariaqartinneqalersinnaavoq.

Allilerineq 1.000.000-2.000.000 kr. akornanni akeqassasoq aammalu nutaamik sananissaq 4.000.000-5.000.000 kr. akornanni akeqassasoq naliliisoqarpoq. Taamatut pisoqarnerani nunaqarfimmi containerimik aaqqiissuteqarallartoqarsinnaavoq. Nutaamik innaallagissiorfiliorneq minnerpaamik ukiumik ataatsimik sivilissuseqarajuppoq”

Namminersortunut aningaasaatigut allaffissornikkullu kingunerisassai:

Qerititsiviit pilersinneqarnermikkut aalisartunut inuussutissarsiornermikkut iluaqutigissavaat tunitsivissaaleqineq akiorneqassamat. Ataavartumillu aaqqiinerummat siunissamut qulakkiinerussaaq.

Innuttaasunut aningaasatigut allaffissornikkullu kingunerisassai:

Nunaqarfimmi innuttaasunut iluaqutaassaaq nunaqarfimmi aalisarneq inerisarneqarpat aningaasat kaaviiartinneqartut ataavartumik pilertussaammata.

https://ina.gl/documents/para3637/2018/svar/128_2018_frysekapacitet_bygderne_PPOL_akis-sut.pdf